

आकाशवाणी

खास-खास खबरां:-

1. प्रधानमंत्री नरेन्द्र मोदी अज्ज दक्खन कोरिया दे राष्ट्रपति ली जे म्युंग हुंदे कन्नै गल्लबात करडन।
2. उपराष्ट्रपति सी.पी. राधाकृष्णन ते श्रीलंका दे राष्ट्रपति अनूरा कुमारा दिशा नायकें होरें भारत ते श्रीलंका बश्कार प्रस्तावित तेल पाईन लाईन सरबन्धी योजना पर चर्चा कीती।
3. भारत ते अमरीका बश्कार प्रस्तावित दपक्खी बपार समझौते दे पैहले गेड़ लेई आमने-सामने दी गल्लबात अज्जै थमां फही शुरु होग।
4. ईरान नै अमरीका दे कन्नै दुए दौर दी शांति वार्ता लेई राजी होने थमां नां करी दिती ऐ।
5. भारती चुनांस आयोग नै पच्छिम बंगाल च असैम्बली चुनाएं दे पैहले गेड़ लेई मतदाताएं दी गिनतरी आले आंकड़े जारी करी दिते न।
6. आई.पी.एल क्रिकेट च कल न्यूचंडीगढ़ च होए दे मुकाबले च पंजाब किंग्स नै लखनऊ सुपर जायंट्स गी 54 रन्जें कन्नै हराई दिता।

<><><><><><>

PM -South Korea

प्रधानमंत्री नरेन्द्र मोदी अज्ज नमीं दिल्ली च दक्खन कोरिया दे राष्ट्रपति ली जे म्युंग हुंदे नै गल्लबात करडन। दौनें नेतां बश्कार बक्ख-बक्ख इलाकें च दपक्खी सैहयोग गी मजबूत करने लेई चर्चा कीती जाहग। इंदे च समुन्द्री जहाजें दे निर्माण- बपार-निवेश- AI- सेमीकंडक्टर- महत्वपूर्ण ते नमीं उभरा करदी तकनीकें- दौनें मुखें दे लोकें बश्कार सरबन्ध ते सांस्कृतिक आदान-प्रदान आले खेतर शामिल न। राष्ट्रपति ली जे म्युंग-राष्ट्रपति द्रौपदी मुरमू हुंदे नै बी गल्लबात करडन। तोंआई बदेश मंत्री डाक्टर एस. जयशंकर होरें कल नमीं दिल्ली च दक्खन कोरिया दे राष्ट्रपति हुंदे कन्नै मलाटी कीती। डाक्टर जयशंकर होरें बक्ख-बक्ख खेतरें च दपक्खी सरबन्धें गी मजबूत करने लेई दक्खन कोरिया दे राष्ट्रपति हुंदी मजबूत वचनबद्धता दी सराहनी कीती। दक्खन कोरिया दे राष्ट्रपति कल भारत दे त्रऊ दिनें दे दौरे पर नमीं दिल्ली पुज्जे हे।

<><><><><><>

Sgr. –US Tourist Detained

श्रीनगर अंतराष्ट्रीय ब्हाई अड्डे पर दंडु अमरीकी सैलानिएं गी उन्दे समान चा इक सैटेलाइट फोन बरामद कीते जाने दे परैन्त -पुच्छ गिच्छ लेई हिरासत च लेता गेआ ऐ। पुलस नै आखेआ ऐ जे सैटेलाइट फोन भारत च नियंत्रित संचार उपकरण दी श्रेणी च औंदा ऐ ते मुल्खै च इनें संचार उपकरणें दे इस्तेमाल आस्तै खास इजाजत दी लोड़ हूंदी ऐ। अधिकारिएं दस्सेआ जे इस उपकरण दा पता लग्गने कन्नै सुरक्षा सरबन्धी नियमें गी लागू कीता गेई- जेहदे मगरा इनें उपकरणें गी नियंत्रित करने सरबन्धी कनूनी जरूरतें दी तस्दीक करने लेई लोकें गी फौरी तौरा पर हिरासत च लेता गेआ ते पुच्छ-गिच्छ कीती गेई।



VP -Srilanka

उपराष्ट्रपति सी.पी. राधाकृष्णन ते श्रीलंकाई राष्ट्रपति अनुरा कुमारा दिशा-नायकें होरें भारत ते श्रीलंका बश्कार प्रस्तावित तेल पाईप- लाईन परियोजना बारे कल चर्चा कीती। बदेश सचिव विक्रम मिसरी होरें कल कोलम्बो च दस्सेआ जे दौनें मुल्खें बश्कार जेहड़े किश प्रस्तावें पर चर्चा कीती गेई उन्दे च त्रिनकोलामले च इक ऊर्जा केन्द्र कन्नै जुड़ी दी परियोजना ते भारत ते श्रीलंका गी इक तेल पाईप लाईन दे राहें जोड़ने दी परियोजना बी शामिल ऐ। मिसरी होरें इब्बी दस्सेआ जे दौनें नेताएं- दपक्खी सरबन्धें-घरें मकानें सरबन्धी परियोजनाएं ते मच्छेरें सरबन्धी मामलें पर बड़ी नतीजाकुन गल्लबात कीती। बैठक दौरान श्री राधाकृष्णन होरें भारत दी अपने गवांडियें गी तरजीह देने ते विकास-बाददे आले दपक्खी सैहयोग सरबन्धी भारत दी नीति पर चेचा जोर दिता।



India –US Trade

भारत ते अमरीका अपने प्रस्तावित दपक्खी बपार समझौते लेई अज्जै थमां आमने-सामने बेहिए गल्लबात करने दा सिलसिला परतियै शुरु करडन। इक वरिष्ठ भारती डेलीगेशन आलमी सतह पर लगातार बदला करदे टैरिफ सरबन्धी हालात दे मददेनजर ढांचे गी तगड़ा बनाने गितै व्रंडु गेड़ दी गल्लबात लेई वाशिंगटन पुज्जा करदा ऐ। एह बैठक तकरीबन चंडु महीनें दरान पैहली बारी आमने-सामने बेहिए कीती जा'रदी ऐ कीजे एहदे शा पहले गल्लबात छड़ी वर्चुएल ढंग्गै राहें गै कीती जा करदी ही। भारती

टीम दी अगुआई वरिष्ठ वार्ताकार दर्पण जैन करा'रदे न ते उन्दी टीम च बपार-कस्टम्स ते बदेश मंत्रालय थमां बी अधिकारी शामिल न।

<><><><><><>

Iran -Peace Talks

ईरान ने अमरीका कन्नै दुए गेड़ दी शांति वार्ता लेई राजी होने थमां इंकार करी दिता ऐ- जिसले के अमरीकी डोनाल्ड ट्रम्प होरें आखेआ हा जे अमरीकी वार्ताकार गल्लबात करने आस्तै अज्ज रातीं पाकिस्तान पुजगंन। ईरान दी अधिकारिक समाचार एजेंसी IRNA नै आखेआ ऐ जे वाशिंगटन दी बड़ी मती मंगें- गैरहकीकी आसैं-तांगे ते रौंस च लगातार तब्दीली सनें घड़ी-घड़ी विरोधाभास ते नौसैनिक नाकेबंदी करने दे चलदे गल्लबात मना कीती जा'रदी ऐ। उ'नें इस नाकेबंदी गी संघर्ष विराम दी शर्ते दी उल्लंघना करार दिता। ईरान दे Revolutionary Guard नै होर्मुज जल डमरु मध्य गी बी बंद करी दिता ऐ- जेहदे च बपारी जहाजें गी स्पष्ट इजाजत हासिल करने ते गार्ड मंजूरशुदा रस्ते पर गै चलने दी लोड़ दस्सी गेई ऐ। चेतावनी दिती गेई ऐ जे बगैर मंजूरी दे औने आहलें जहाजें गी निशाना बनाया जाई सकदा ऐ।

<><><><><><>

WB -Voters

चुनांस आयोग नै पच्छिम बंगाल च असैम्बली चुनाएं दे पैहले गेड़ लेई मतदाताएं दी गिनतरी दे आंकड़े जारी कीते न। अधिकारिक आंकड़े मताबक इस गेड़ दे तैहत 3 करोड़ 60 लख 77 जहार 171 योग्य मतदाता वोट पाने दे अपने अधिकार दा इस्तेमाल करडन। इंदे चा इक करोड़ 84 लख 99 जहार 496 मर्द मतदाता- इक करोड़ 75 लख 77 जहार 210 महिला मतदाता ते 465 थर्ड- जेंडर मतदाता न। अदालतें आसेआ योग्य मतदाताएं दी मुक्कदी सूची जारी करने दे बाद इनें आंकड़े च होर बाददा बी होई सकदा ऐ।

<><><><><><>

Trump -Cargo

अमरीकी राष्ट्रपति डोनाल्ड ट्रम्प होरें आखेआ ऐ जे अमरीका नै कल होर्मुज जल डमरु मध्य दे नेड़े नौसैनिक नाकेबंदी गी रोकने दी कोशश करने आहले ईरान दे झंडे आहले

मालवाहक जहाज गी जबरन जब्त करी लैता ऐ- जेहड़ा पिच्छले हफ्ते ईरान दे बंदरगाहें दी नाकेबंदी शुरू होने मगरा इस चाल्ली दी पैहली कारवाई ऐ।

<><><><><><>

Security -Pahalgam Attack

पिच्छले बरे 22 अप्रैल गी लश्कर-ए-तैयबा दे आतंकवादियें आसेआ 26 जनें दी गोली मारियें हत्या कीते जाने आहले पहलगाम आतंकी हमले दी पैहली बरसी कोला पैहले-जम्मू-कश्मीर दिएं सैलानी थाहरें पर सुरक्षा होर निगगर करी दिती गई ऐ। सब्बने सुरक्षा एजेंसियें गी निर्देश दिते गे न जे ओह कुसै बी संभावित आतंकी गतिविधि लेई सोहगे-सतर्क रौहन। इक निगगर सुरक्षा योजना तयार करने गितै जमीनी सतह पर तयारियें सरबन्धी बैठकां बी लोआई जा'रदियां न। अधिकारियें व्यापक समीक्षा कीती ते सैलानियें गी सेवां मुहेइया कराने आहलें दी तस्दीक सनें सख्त उपाएं गी लागू कीता ऐ।

तोंआई पहलगाम च सैलसफा गतिविधियां परतियें शुरू होई गेदियां न ते सैलानें दा रश इस लोकप्रिय थाहरें पर परतोई आया ऐ।

<><><><><><>

IPL Cricket

IPL क्रिकेट च पंजाब किंग्स नै कल रातीं न्यू-चंडीगढ़ च लखनऊ सुपर जायंट्स गी 54एं रन्जें कन्नै रहाई दिता। 255 रन्जें दे लक्ष्य दा पीछा करदे होई लखनऊ सुपर जायंट्स दी टीम निर्धारत 20एं ओवरें च 5एं विकेटें दे नुक्सान पर छड़े 200 रन्ज गै बनाई सकी। पंजाब किंग्स दी तरफा मार्को जानसन नै दंऊ विकेटां हासल कीतियां जिसलै के अर्शदीप सिंह, विजयकुमार विशक ते युजुवेन्द्र चहल ने इक-इक विकेट हासल कीता।

<><><><><><>

IMD Weather

भारती मौसम विभाग नै राजस्थान - उत्तर प्रदेश- मध्य प्रदेश- च अज्ज जबरदस्त गर्मी ते लू चलने दी भविक्खवाणी कीती गई ऐ। विभाग नै आखेआ ऐ जे पच्छिम बंगाल दे किश हिस्सें सनें समुन्द्री कंडूटे आले आंध्र प्रदेश- कर्नाटक- केरल ते माहे च

अगले दंऊ-त्रंऊ दिनें दरान मौसम गर्म ते उमस भरोसा रौहग। नेह गै हालात तमिनाडू-
पुदुचेरी ते कराईकल च बी बने दे रौहगंन।

<><><><><><>